



Wa`mer vörnehm weed

En d'r Hasegaß do wunnte en Familig namens Schmitz, die sich nit vum Beste stunte, hatte Geld nie em Besitz. Wie dat öftersch nu su vörkütt, woren durch de Lotterie plötzlich se zo jet gekumme un se komen en de Hüh! Doch et Spröchwoot säht, bei denne, immer, die et ehz nix han, wann die ens zo Grosche kumme, fängk d'r Stolz zo wäulen an!

"Ehztens us däm ahle Veedel!", heeß et "nix als wie eraus!" Noh d'r Neustadt wood getrocke, in ein herrschaftliches Haus! Jetz dat Mädchen vun fünf Johre, wat dä Schmitz ehr einzig wor, dat heeß "Gudela", dä Name klung nit vornehm, dat es klor! Doröm wood jetz die Betonung statt op "u" op "e" jelaht un met zogetrocke Lippe nor Gudéla noch gesaht. Och däm Kind wood engetrichert: Sprech kei kölsch mehr dat 't weiß, wann dich einer sollt wat fragen, nit dat du dich mal verdeis!

Zum Exempel, säht die Mutter, heisch et kölsch: Am gröne Rhing. "Rhing" dat muss do nur nit sage, "Rhein" es vornehm, dat klingk fing. Eines Dags hat sich verlaufe et Gudéla janz allein, en d'r Neustadt, wat leich möglich, för e Kind, wat noch su klein. Met verkresche Auge stund et op d'r Stroß un loht un loht, Lück die merkten glich, dat Pütche woß nit wo et hin gehot.

Bes en Dam it bei de Aerme nohm un säht: "Nu sag geschwind, wie du heißt und sag vor allem, wo du wohnst, mein liebes Kind!" Jetz met ganze große Auge looten it, dann daach et dran, wat sie Mutter im geprädig, un et fing op hochdeutsch an: "Heischen tu ich Gudéla, wohne tue mir janz fein, seit mer Lotterie gewonne, auf dem Hohenzollernrhein!"